

rior pulchris ædificiis surgit; in cuius non ultima laude posuerim, quod nobilis & bellicosa Bremichamorum in Hibernia familia hinc suam originem & nomen duxerit. Inde in extremo hujus agri ad Boream margine *Sutton Colfeild*, loco salutato & ingrato Ioannem *Voisy*, Episcopum Exoniensem alumnū suum prædicat, qui oppidulum jam diu intermortuum (regnante Henrico III.) ædificiis, privilegiis, & ludo litterario excitavit. Hinc descendendo in austrum veni ad *Coleshull*, olim *Clintonorum*, & huic vicinum *Maxstock*, castrum, quod *Limseios*, qui Domini de *VVoilverley*, *Odingellos*, è Flandria oriundos, & *Clintonos*, qui clarissimi fuerunt in hoc agro, perpetua quasi serie hæreditariæ successionis Dominos agnovit.

Inferius in medio Sylvestris hujus regionis *Coventrey* sedet, à conventu dicta, ut credimus, cum ejusmodi Conventum nos nostra lingua *Covent* & *Covenm* appellemus, & sæpius in historiis nostris, & Pontificum decretis *Conventria* dicatur; ut in illo, *Vel non est compos sui Episcopus Conventrensis, vel nimis videtur à se scientiam repulisse*. Sunt tamen qui à fluviolo illo interfluente & hodie *Shirburn* dicto, & in antiqua *Prioratus Charta Cuentsford* concipitur, nomen desumptum volunt. Vndecunque appellatio sit facta, superiori seculo laneis, & pileis conficiendis ditata, unicum fuit harum regionum Emporium, & plusquam mediterranea, frequens: utpote urbs percommodo situ, ampla, nitida, mœnibus munita firmis, & ædificiis exulta pulcherrimis, inter quæ duo rari operis contigua, & quasi æmula exsurgunt templa, alterum sanctæ Trinitati, alterum Michaëli sacrum. Ex intima tamen antiquitate nihil habet, omnium vero antiquissimum videtur fuisse monasterium sive *Prioratus*, cujus parietinas juxta illa templa vidimus quod Sanctimonialibus Canutus rex fundavit, quibus paulo post ejectis anno CIO XL ampliavit, & quasi de novo construxit Leofricus Merciorum Comes, *tanto auri & argenti spectaculo* (Malm. verbis utor) *ut angusti viderentur ipsi parietes Ecclesiæ thesaurorum receptaculis, miraculo porro visentium oculis, ex una enim trabe 50 argenti marca fuerunt erasse*. Tantoque ditavit patrimonio, ut Robertus de *Limseio* Lichfeldensis, & Cestrensis Episcopus huc sedem quasi ad Lydiam arenam transferret: ut, (sic enim scribit Malmesburienensis ille) *ex ipsis Ecclesiæ gazis surriperet, unde Regis manum impleret, unde Papæ occupationes falleret, unde Romanorum aviditati arriperet*. Verum sedes hæc post paucos annos Lichfeldiam remigravit. Ita tamen, ut unus idemque Episcopus *Coventrensis* & *Lichfeldensis* diceretur. Primus hujus urbis Dominus (quod novimus) fuit Leofricus iste, qui in cives commotior gravissimis illos tributis oppressit, quæ nulla alia lege laxari voluit; Godiva uxore obnixè intercedente, nisi ipsa nuda frequentissimam urbis partem obequitaret, quod promississimis suis capillis obtecta, à nemine, si fides sit vulgo, visa præstitit, & Conventrenses suos multis pensitationibus in perpetuum exsolvit. A Leofrico per Luciam ejus ex Algaro filio neptim, in Cestrensi Comitem possessionem pervenit, nupserat enim illa Ranulpho ejus nominis primo, & tertio ex hac stirpe Comiti Cestriæ, qui easdem, quas habuit Lincolnia liberta-

Britannia.

tes, Conventriæ indulgit, magnamque urbis partem monachis donavit, reliquam, & *Chilmore*, quod prædium est *Dominicum* sub urbe, sibi & suis reservavit. Quibus defunctis, cum nulla mascula prole superflite, hæreditas inter sorores in partes diduceretur, Conventria ad Rogerum de *Monte-alto*, sive *Mont-hault*, mediate per Arundeliæ Comites descendit. Cujus è filio nepos Robertus omne jus suum concessit *pro defectu masculorum de corpore*, *Isabella Regina matri Regis* (Edwardi sc. Tertii) *tenenda tota vita ipsius Reginae, & post ejus decessum remanere Ioanni de Eltham fratri Regis & hæreditibus de corpore suo procreatis, pro defectu remanere Edwardo Regi Angliæ, &c.* Sic enim habetur in *Fine* anno secundo Edwardi Tertii, Ioannes autem de *Eltham* postea Cornubiæ Comes creatus, & hic locus Cornubiæ Comitatus adjunctus. Iam inde in primis floruit, Reges varias immunitates dederunt, præcipue Edwardus Tertius, qui Prætores duosque *Ballivos* eligere permisit, & Henricus Sextus, qui, aliquot vicinis oppidulis adjunctis concessit, ut *Integer Comitatus per se corporatus* (ipsius Chartæ verbis loquor) *in re & nomine esset, distinctusque à Comitatu de VVarwick*. Quo tempore pro *Ballivis* duos instituit *Vicecomites*, firmissimisque mœnibus cives urbem obvallare cœperunt: in quibus sunt portæ pulcherrimæ, & ad illam quæ *Gofford* dicta, ingens os spatulare Apri immanis spectatur, quem vel Guidonem Warwicensem, vel Dianam Nemorensem inter venandum peremisse putes, cum puteum illum sive stagnum eruncasset, quod hodie *Swanewell Poole*, sed olim *Swineswell* appellatum fuisse antiquarum *Chartarum* probat autoritas.

Quod ad longitudinem attinet, xxv partibus, LII scrupulis, quod ad latitudinem, LII gradibus, xxv scrupulis definitur. Hactenus de *Conventria*, quæ tamen non à me, (ut libens agnoscam per quem profeci) sed ab Henrico Ferrario de *Baddesley* viro cum generis splendore, tum antiquitatis cognitione laudatissimo, & vere amicissimo, qui mihi hic & alibi erranti semper viam comiter monstravit, & quasi lumen de suo lumine accendit.

Juxta *Conventriam* ad Boream *Ausley* castrum quondam *Hastingorum*, qui Domini *Abergeven* næ fuerunt, & *Brand*, olim *Verdoniorum* habitatio locantur: ad Ortum *Caloughdon*, vulgo *Caledon* locum habet, antiqua sedes Baronum *Segrave*, à quibus ad Barones de *Berkley* per alteram filiam *Th. Mowbraii* *Norfolciæ Ducis* descendit. *Segravii* hi, ex quo *Stephanus* *Iustitarius Angliæ* fuit, Baronum honore claruerunt, *Chaucumborum* hæreditatem adierunt, quorum etiam insignia jam inde usurparunt, Leonem scilicet argenteum insurgentem & auro coronatum in clypeo nigro. Ultimus vero Ioannes *Margaretam Ducissam* *Norfolciæ*, *Thomæ de Brotherton* filiam duxit, filiamque progenit *Elizabetham*, quæ *Marescalli Angliæ* dignitatem, & Ducis *Norfolciæ* titulum in *Mowbraiorum* familiam intulit. *Brinklo* etiam non multum hinc abest, ubi castrum erat antiquum *Mowbraiorum*, ad quod multa circumvicina prædia spectarunt, sed hujus etiam rudera temporis vetustas prorsus erasit, ut etiam *Monasterii Combe*, quod *Camvilli* & *Mowbraii* possessionibus

De Monte-alto.

Honorius
3. cap. 14.
Decret.

Conventriae Domini.

1050.
Florilegus.

Ausley.

Brand.

Caledon.
Barones
Segrave.

Insignia
Segravio-
rum.

Brinklo
Cattle.

Combe
Abbey.

V u u